

# 1 Tīmuthiyus

<sup>1</sup> Yih khat Paulus kī taraf se hai jo hamāre Najātdahindā Allāh aur hamārī ummīd Masīh Īsā ke hukm par Masīh Īsā kā rasūl hai.

<sup>2</sup> Maiñ Tīmuthiyus ko likh rahā hūñ jo īmān meñ merā sachchā beṭā hai.

Ḳhudā Bāp aur hamārā Ḳhudāwand Masīh Īsā āp ko fazl, rahm aur salāmatī atā karen.

## *Ġhalat Tālīm se Ḳhabardār*

<sup>3</sup> Maiñ ne āp ko Makiduniyā jāte waqt nasīhat kī thī ki Ifisus meñ raheñ tāki āp wahāñ ke kuchh logoñ ko ḡhalat tālīm dene se rokeñ.

<sup>4</sup> Unheñ farzī kahāniyoñ aur khatm na hone wāle nasabnāme ke pīchhe na lagne deñ. In se mahz bahs-mubāhasā paidā hotā hai aur Allāh kā najātbakḡsh mansūbā pūrā nahīñ hotā. Kyonki yih mansūbā sirf īmān se takmīl tak pahuñchtā hai.

<sup>5</sup> Merī is hidāyat kā maqsad yih hai ki muhabbat ubhar āe, aisī muhabbat jo kḡhalis dil, sāf zamīr aur Beriyyā īmān se paidā hotī hai.

<sup>6</sup> Kuchh log in chīzoñ se bhaṭak kar bemānī bātoñ meñ gum ho gae haiñ.

<sup>7</sup> Yih shariyat ke ustād bananā chāhte haiñ, lekin unheñ un bātoñ kī samajh nahīñ ātī jo wuh kar rahe haiñ aur jin par wuh itne etamād se isrār kar rahe haiñ.

<sup>8</sup> Lekin ham to jānte haiñ ki shariyat achchhī hai basharteki ise sahīh taur par istemāl kiyā jāe.

<sup>9</sup> Aur yād rahe ki yih rāstbāzoñ ke lie nahīñ dī gaī. Kyoñki yih un ke lie hai jo baḡhair sharīat ke aur sarkash zindagī guzārte haiñ, jo bedīn aur gunāhgār haiñ, jo muḡaddas aur ruhānī bātoñ se khalī haiñ, jo apne māñ-bāp ke qātil haiñ, jo kḡhūnī,

<sup>10</sup> zinākār, hamjinsparast aur ḡhulāmoñ ke tājir haiñ, jo jhūṭ bolte, jhūṭī qasam khāte aur mazīd bahut kuchh karte haiñ jo sehhatbaḡhsh tālīm ke kḡhilāf hai.

<sup>11</sup> Aur sehhatbaḡhsh tālīm kyā hai? Wuh jo mubārak Kḡhudā kī us jalālī kḡhushkḡhabrī meñ pāī jāṭī hai jo mere sapurd kī gaī hai.

### *Allāh ke Rahm ke lie Shukrguzārī*

<sup>12</sup> Maiñ apne Kḡhudāwand Masīh Īsā kā shukr kartā hūñ jis ne merī taqwiyaṭ kī hai. Maiñ us kā shukr kartā hūñ ki us ne mujhe wafādār samajh kar kḡhidmat ke lie muḡarrar kiyā.

<sup>13</sup> Go maiñ pahle kufr bakne wālā aur gustākḡh ādmī thā, jo logoñ ko izā detā thā, lekin Allāh ne mujh par rahm kiyā. Kyoñki us waqt maiñ īmān nahīñ lāyā thā aur is lie nahīñ jāntā thā ki kyā kar rahā hūñ.

<sup>14</sup> Hāñ, hamāre Kḡhudāwand ne mujh par apnā fazl kasrat se unḡdel diyā aur mujhe wuh īmān aur muḡhabbat atā kī jo hameñ Masīh Īsā meñ hote hue miltī hai.

<sup>15</sup> Ham is qābil-e-qabūl bāt par pūrā bharosā rakh sakte haiñ ki Masīh Īsā gunāhgāroñ ko najāt dene ke lie is duniyā meñ āyā. Un meñ se maiñ sab se baḡā gunāhgār hūñ,

<sup>16</sup> lekin yihī wajah hai ki Allāh ne mujh par rahm kiyā. Kyoṅki wuh chāhtā thā ki Masīh Īsā mujh meṅ jo awwal gunāhgār hūn apnā wasī sabar zāhir kare aur maiṅ yoṅ un ke lie namūnā ban jāūn jo us par īmān lā kar abadī zindagī pāne wāle haiṅ.

<sup>17</sup> Hān, hamāre azlī-o-abadī Shahanshāh kī hameshā tak izzat-o-jalāl ho! Wuhī lāfānī, andekhā aur wāhid Ḳhudā hai. Āmīn.

<sup>18</sup> Tīmuthiyus mere beṭe, maiṅ āp ko yih hidāyat un peshgoiyōn ke mutābiq detā hūn jo pahle āp ke bāre meṅ kī gaī thīn. Kyoṅki maiṅ chāhtā hūn ki āp in kī pairawī karke achchhī tarah laṛ sakeṅ

<sup>19</sup> aur īmān aur sāf zamīr ke sāth zindagī guzār sakeṅ. Kyoṅki bāz ne yih bāteṅ radd kar dī haiṅ aur natīje meṅ un ke īmān kā beṛā gharq ho gayā.

<sup>20</sup> Huminyus aur Sikandar bhī in meṅ shāmil haiṅ. Ab maiṅ ne inheṅ Iblīs ke hawāle kar diyā hai tāki wuh kufr bakne se bāz ānā sikeṅ.

## 2

### *Jamāt kī Parastish*

<sup>1</sup> Pahle maiṅ is par zor denā chāhtā hūn ki āp sab ke lie darkhāsteṅ, duāeṅ, siphārisheṅ aur shukrguzāriyān pesh kareṅ,

<sup>2</sup> bādshāhoṅ aur iḳhtiyār wāloṅ ke lie bhī tāki ham ārām aur sukūn se ḳhudātars aur sharif zindagī guzār sakeṅ.

<sup>3</sup> Yih achchhā aur hamāre Najātdahindā Allāh ko pasandīdā hai.

<sup>4</sup> Hān, wuh chāhtā hai ki tamām insān najāt pā kar sachchāi ko jān len.

<sup>5</sup> Kyoñki ek hī Ḳhudā hai aur Allāh aur insān ke bīch meñ ek hī darmiyānī hai yānī Masīh Īsā, wuh insān

<sup>6</sup> jis ne apne āp ko fidyā ke taur par sab ke lie de diyā tāki wuh maḳhlasī pāeñ. Yoñ us ne muḡarrarā waqt par gawāhī dī

<sup>7</sup> aur yih gawāhī sunāne ke lie mujhe munād, rasūl aur Ḡhairyahūdiyoñ kā ustād muḡarrar kiyā tāki unheñ imān aur sachchāi kā paighām sunāñ. Main jhūṭ nahīn bol rahā balki sach kah rahā hūñ.

<sup>8</sup> Ab main chāhtā hūñ ki har maḡāmī jamāt ke mard muḡaddas hāth uṭhā kar duā kareñ. Wuh ḡhusse yā bahs-mubāhasā kī hālat meñ aisā na kareñ.

<sup>9</sup> Isī tarah main chāhtā hūñ ki ḡhawātīn munāsib kapṛe pahan kar sharāfat aur shāystagī se apne āp ko ārāstā kareñ. Wuh gundhe hue bāl, sonā, motī yā had se zyādā mahange kapṛoñ se apne āp ko ārāstā na kareñ

<sup>10</sup> balki nek kāmoñ se. Kyoñki yihī aisī ḡhawātīn ke lie munāsib hai jo ḡhudātars hone kā dāwā kartī haiñ.

<sup>11</sup> Ḳhātūn ḡhāmoshī se aur pūrī farmānbardārī ke sāth sīkhe.

<sup>12</sup> Main ḡhawātīn ko tālīm dene yā ādmiyoñ par hukūmat karne kī ijāzat nahīn detā. Wuh ḡhāmosh raheñ.

<sup>13</sup> Kyoñki pahle Ādam ko tashkīl diyā gayā, phir Hawwā ko.

<sup>14</sup> Aur Ādam ne Iblīs se dhokā na khāyā balki

Hawwā ne, jis kā natījā gunāh thā.

<sup>15</sup> Lekin khawātīn bachche janm dene se najāt pāēngī. Shart yih hai ki wuh samajh ke sāth imān, muhabbat aur muqaddas hālat meñ zindagī guzārtī raheñ.

### 3

#### *Khudā kī Jamāt ke Nigarān*

<sup>1</sup> Yih bāt yaqīnī hai ki jo jamāt kā nigarān bananā chāhtā hai wuh ek achchhī zimmedārī kī ārzū rakhtā hai.

<sup>2</sup> Lāzim hai ki nigarān be'ilzām ho. Us kī ek hī bīwī ho. Wuh hoshmand, samajhdār, \* sharīf, mehmān-nawāz aur tālim dene ke qābil ho.

<sup>3</sup> Wuh sharābī na ho, na laṛākā balki narmdil aur amnpasand. Wuh poison kā lālach karne wālā na ho.

<sup>4</sup> Lāzim hai ki wuh apne khāndān ko achchhī tarah sañbhāl sake aur ki us ke bachche sharāfat ke sāth us kī bāt māneñ.

<sup>5</sup> Kyonki agar wuh apnā khāndān na sañbhāl sake to wuh kis tarah Allāh kī jamāt kī dekh-bhāl kar sakegā?

<sup>6</sup> Wuh naumurīd na ho warnā khatrā hai ki wuh phūl kar Iblīs ke jāl meñ ulajh jāe aur yon us kī adālat kī jāe.

<sup>7</sup> Lāzim hai ki jamāt se bāhar ke log us kī achchhī gawāhī de sakeñ, aisā na ho ki wuh badnām ho kar Iblīs ke phande meñ phañs jāe.

#### *Jamāt ke Madadgār*

---

\* **3:2** Yūnānī lafz meñ zabt-e-nafs kā unsur bhī pāyā jātā hai.

<sup>8</sup> Isī tarah jamāt ke madadgār bhī sharīf hoñ. Wuh riyākār na hoñ, na had se zyādā mai pieñ. Wuh lālchī bhī na hoñ.

<sup>9</sup> Lāzim hai ki wuh sāf zamīr rakh kar īmān kī purasrār sachchāiyān mahfūz rakheñ.

<sup>10</sup> Yih bhī zarūrī hai ki unheñ pahle parkhā jāe. Agar wuh is ke bād be'ilzām nikleñ to phir wuh k̄hidmat kareñ.

<sup>11</sup> Un kī bīwiyañ bhī sharīf hoñ. Wuh buhtān lagāne wālī na hoñ balki hoshmand aur har bāt meñ wafādār.

<sup>12</sup> Madadgār kī ek hī bīwī ho. Lāzim hai ki wuh apne bachchoñ aur k̄hāndān ko achchhī tarah sañbhāl sake.

<sup>13</sup> Jo madadgār achchhī tarah apnī k̄hidmat sañbhālte haiñ un kī haisiyat barh jāegī aur Masih Īsā par un kā īmān itnā puḁhtā ho jāegā ki wuh bare etamād ke sāth zindagī guzār sakeñge.

### *Ek Azīm Bhed*

<sup>14</sup> Agarche maiñ jald āp ke pās āne kī ummīd rakhtā hūñ to bhī āp ko yih k̄hat likh rahā hūñ.

<sup>15</sup> Lekin agar der bhī lage to yih parh kar āp ko mālūm hogā ki Allāh ke gharāne meñ hamārā bartāw kaisā honā chāhie. Allāh kā gharānā kyā hai? Zindā K̄hudā kī jamāt, jo sachchāī kā satūn aur buniyād hai.

<sup>16</sup> Yaqīnan hamāre īmān kā bhed azīm hai.

Wuh jism meñ zāhir huā,  
Rūh meñ rāstbāz ṭhahrā  
aur farishtoñ ko dikhāī diyā.

Us kī Ghairyahūdiyoñ meñ munādī kī gaī,  
us par duniyā meñ īmān lāyā gayā  
aur use āsmān ke jalāl meñ uṭhā liyā gayā.

## 4

*Jhūṭe Ustād*

<sup>1</sup> Rūhul-quḏs sāf farmātā hai ki ākhirī dinon meñ kuchh imān se haṭ kar farebdeh rūhon aur shaitānī tālīmāt kī pairawī kareṅge.

<sup>2</sup> Aisi tālīmāt jhūṭ bolne wālon kī riyākār bāton se ātī haiñ, jin ke zamīr par Iblīs ne apnā nishān lagā kar zāhir kar diyā hai ki yih us ke apne haiñ.

<sup>3</sup> Yih shādī karne kī ijāzat nahīn dete aur logon ko kahte haiñ ki wuh muḳhtalif khāne kī chīzon se parhez karen. Lekin Allāh ne yih chīzen is lie banāi haiñ ki jo imān rakhte haiñ aur sachchāi se wāqif haiñ inheñ shukrguzārī ke sāth khāen.

<sup>4</sup> Jo kuchh bhī Allāh ne ḳhalaq kiyā hai wuh achchhā hai, aur hameñ use radd nahīn karnā chāhie balkī Ḳhudā kā shukr karke use khā lenā chāhie.

<sup>5</sup> Kyonki use Allāh ke kalām aur duā se maḳhsūs-o-muḳaddas kiyā gayā hai.

*Masīh Īsā kā Achchhā Ḳhādīm*

<sup>6</sup> Agar āp bhāiyon ko yih tālīm den to āp Masīh Īsā ke achchhe ḳhādīm hoṅge. Phir yih sābit ho jāegā ki āp ko imān aur us achchhī tālīm kī sachchāiyon meñ tarbiyat dī gaī hai jis kī pairawī āp karte rahe haiñ.

<sup>7</sup> Lekin dādī-ammān kī in bemānī farzī kahāniyon se bāz raheñ. In kī bajāe aisi tarbiyat hāsil karen jis se āp kī ruhānī zindagī mazbūt ho jāe.

<sup>8</sup> Kyonki jism kī tarbiyat kā thorā hī fāydā hai, lekin ruhānī tarbiyat har lihāz se mufid hai, is

lie ki agar ham is qism kī tarbiyat hāsil karen to ham se hāl aur mustaqbil meñ zindagī pāne kā wādā kiyā gayā hai.

<sup>9</sup> Yih bāt qābil-e-etamād hai aur ise pūre taur par qabūl karnā chāhie.

<sup>10</sup> Yihī wajah hai ki ham mehnat-mashaqqat aur jāñfishānī karte rahte haiñ, kyonki ham ne apnī ummīd zindā Kḥudā par rakhī hai jo tamām insānoñ kā Najātdahindā hai, kḥaskar imān rakhne wāloñ kā.

<sup>11</sup> Logoñ ko yih hidāyāt deñ aur sikhāeñ.

<sup>12</sup> Koī bhī āp ko is lie haqīr na jāne ki āp jawān haiñ. Lekin zarūrī hai ki āp kalām meñ, chāl-chalan meñ, muhabbat meñ, imān meñ aur pākīzagī meñ imāndāroñ ke lie namūnā ban jāeñ.

<sup>13</sup> Jab tak maiñ nahīñ ātā is par kḥās dhyān deñ ki jamāt meñ bāqāydaḡī se kalām kī tilāwat kī jāe, logoñ ko nasīhat kī jāe aur unheñ tālīm dī jāe.

<sup>14</sup> Apnī us nemat ko nazarandāz na karen jo āp ko us waqt peshgoī ke zariye milī jab buzurgoñ ne āp par apne hāth rakhe.

<sup>15</sup> In bātoñ ko faroḡh deñ aur in ke pīchhe lage raheñ tāki āp kī taraqqī sab ko nazar āe.

<sup>16</sup> Apnā aur tālīm kā kḥās kḥayāl rakheñ. In meñ sābitqadam raheñ, kyonki aisā karne se āp apne āp ko aur apne sunane wāloñ ko bachā leñge.

## 5

*Imāndāroñ se Sulūk*



<sup>1</sup> Buzurg bhāiyōñ ko saḡhtī se na dāñṭnā balki unheñ yoñ samjhānā jis tarah ki wuh āp ke bāp hoñ. Isī tarah jawān ādmiyoñ ko yoñ samjhānā jaise wuh āp ke bhāi hoñ,

<sup>2</sup> buzurg bahnoñ ko yoñ jaise wuh āp kī māeñ hoñ aur jawān ḡhawātīn ko tamām pākīzagī ke sāth yoñ jaise wuh āp kī bahneñ hoñ.

<sup>3</sup> Un bewāoñ kī madad karke un kī izzat kareñ jo wāqāi zarūratmand haiñ.

<sup>4</sup> Agar kisī bewā ke bachche yā pote-nawāse hoñ to us kī madad karnā unhīn kā farz hai. Hāñ, wuh sīkheñ ki ḡhudātars hone kā pahlā farz yih hai ki ham apne ghar wāloñ kī fikr kareñ aur yoñ apne māñ-bāp, dādā-dādī aur nānā-nānī ko wuh kuchh wāpas kareñ jo hameñ un se milā hai, kyoñki aisā amal Allāh ko pasand hai.

<sup>5</sup> Jo aurat wāqāi zarūratmand bewā aur tanhā rah gaī hai wuh apnī ummīd Allāh par rakh kar dīn rāt apnī iltijāoñ aur duāoñ meñ lagī rahtī hai.

<sup>6</sup> Lekin jo bewā aish-o-ishrat meñ zindagī guzārtī hai wuh zindā hālat meñ hī murdā hai.

<sup>7</sup> Yih hidāyāt logoñ tak pahuñchāeñ tāki un par ilzām na lagāyā jā sake.

<sup>8</sup> Kyoñki agar koī apnoñ aur ḡhāskar apne ghar wāloñ kī fikr na kare to us ne apne imān kā inkār kar diyā. Aisā shaḡhs ḡhairīmāndāroñ se badtar hai.

<sup>9</sup> Jis bewā kī umr 60 sāl se kam hai use bewāoñ kī fahrist meñ darj na kiyā jāe. Shart yih bhī hai ki jab us kā shauhar zindā thā to wuh us kī wafādār rahī ho

<sup>10</sup> aur ki log us ke nek kāmoñ kī achchhī gawāhī de sakeñ, masalan kyā us ne apne

bachchoñ ko achchhī tarah pālā hai? Kyā us ne mehmān-nawāzī kī aur muqaddasīn ke pāñw dho kar un kī khidmat kī hai? Kyā wuh musibat meñ phañse huoñ kī madad kartī rahī hai? Kyā wuh har nek kām ke lie koshāñ rahī hai?

<sup>11</sup> Lekin jawān bewāeñ is fahrist meñ shāmil mat karnā, kyoñki jab un kī jismānī khāhishāt un par ghālib ātī haiñ to wuh Masīh se dūr ho kar shādī karnā chāhtī haiñ.

<sup>12</sup> Yoñ wuh apnā pahlā imān chhor kar mujrim thahartī haiñ.

<sup>13</sup> Is ke alāwā wuh sust hone aur idhar-udhar gharoñ meñ phirne kī ādī ban jātī haiñ. Na sirf yih balki wuh bātūnī bhī ban jātī haiñ aur dūsroñ ke muāmalāt meñ daḡhl de kar nāmūnāsib bāteñ kartī haiñ.

<sup>14</sup> Is lie maiñ chāhtā hūñ ki jawān bewāeñ dubārā shādī karke bachchoñ ko janm deñ aur apne gharoñ ko sañbhāleñ. Phir wuh dushman ko badgoī karne kā mauqā nahīñ deñgī.

<sup>15</sup> Kyoñki bāz to sahīh rāh se haṭ kar Iblīs ke pīchhe lag chukī haiñ.

<sup>16</sup> Lekin jis imāndār aurat ke khāndān meñ bewāeñ haiñ us kā farz hai ki wuh un kī madad kare tāki wuh Khudā kī jamāt ke lie bojh na baneñ. Warnā jamāt un bewāoñ kī sahīh madad nahīñ kar sakegī jo wāqāī zarūratmand haiñ.

<sup>17</sup> Jo buzurg jamāt ko achchhī tarah sañbhālte haiñ unheñ dugnī izzat ke lāyq samjhā jāe.\* Maiñ khāskar un kī bāt kar rahā hūñ jo pāk kalām sunāne aur tālīm dene meñ mehnat-mashaqqat karte haiñ.

---

\* **5:17** Yahān matlab hai ki un kī izzat khāskar māli lihāz se kī jāe.

18 Kyoṅki kalām-e-muqaddas farmātā hai, “Jab tū fasal gāhne ke lie us par bail chalne detā hai to us kā muñh bāndh kar na rakhnā.” Yih bhī likhā hai, “Mazdūr apnī mazdūrī kā haqdār hai.”

19 Jab kisī buzurg par ilzām lagāyā jāe to yih bāt sirf is sūrat meñ māneñ ki do yā is se zyādā gawāh is kī tasdīq kareñ.

20 Lekin jinhoñ ne wāqai gunāh kiyā ho unheñ pūrī jamāt ke sāmne samjhāeñ tāki dūsre aisī harkateñ karne se ḍar jāeñ.

21 Allāh aur Masīh Īsā aur us ke chunīdā farishtoñ ke sāmne main sanjīdagī se tākīd kartā hūñ ki in hidāyāt kī yoñ pairawī kareñ ki āp kisī muāmale se sahīh taur par wāqif hone se peshtar faislā na kareñ, na jānibdārī kā shikār ho jāeñ.

22 Jaldī se kisī par hāth rakh kar use kisī khidmat ke lie maḥsūs mat karnā, na dūsroñ ke gunāhoñ meñ sharīk honā. Apne āp ko pāk rakheñ.

23 Chūñki āp aksar bīmār rahte haiñ is lie apne mede kā lihāz karke na sirf pānī hī piyā kareñ balki sāth sāth kuchh mai bhī istemāl kareñ.

24 Kuchh logoñ ke gunāh sāf sāf nazar āte haiñ, aur wuh un se pahle hī adālat ke taḥkt ke sāmne ā pahuñchte haiñ. Lekin kuchh aise bhī haiñ jin ke gunāh goyā un ke pīchhe chal kar bād meñ zāhir hote haiñ.

25 Isī tarah kuchh logoñ ke achchhe kām sāf nazar āte haiñ jabki bāz ke achchhe kām abhī nazar nahīñ āte. Lekin yih bhī poshīdā nahīñ raheñge balki kisī waqt zāhir ho jāeñge.

## 6

<sup>1</sup> Jo bhī ghulāmī ke jue meñ haiñ wuh apne mālikoñ ko pūrī izzat ke lāyq samjheñ tāki log Allāh ke nām aur hamārī tālīm par kufr na baken.

<sup>2</sup> Jab mālik imān lāte haiñ to ghulāmoñ ko un kī is lie kam izzat nahīn karnā chāhie ki wuh ab Masīh meñ bhāī haiñ. Balki wuh un kī aur zyādā khidmat karen, kyonki ab jo un kī achchhī khidmat se faydā uṭhā rahe haiñ wuh imāndār aur azīz haiñ.

### *Ghalat Tālīm aur Haqīqī Daulat*

Lāzim hai ki āp logoñ ko in bātoñ kī tālīm deñ aur is meñ un kī hauslā-afzāī karen.

<sup>3</sup> Jo bhī is se farq tālīm de kar hamāre Khudāwand Īsā Masīh ke sehhatbaḥsh alfāz aur is khudātars zindagī kī tālīm se wābastā nahīn rahtā

<sup>4</sup> wuh khudpasandī se phulā huā hai aur kuchh nahīn samajhtā. Aisā shaḥs bahs-mubāhasā karne aur khālī bātoñ par jhagarne meñ ghairsehhatmand dilchaspī letā hai. Natīje meñ hasad, jhagaṛe, kufr aur badgumānī paidā hotī hai.

<sup>5</sup> Yih log āpas meñ jhagaṛne kī wajah se hameshā kurhte rahte haiñ. Un ke zahan bigaṛ gae haiñ aur sachchāī un se chhīn lī gaī hai. Hāñ, yih samajhte haiñ ki khudātars zindagī guzārne se māli nafā hāsīl kiyā jā saktā hai.

<sup>6</sup> Khudātars zindagī wāqai bahut nafā kā bāis hai, lekin shart yih hai ki insān ko jo kuchh bhī mil jāe wuh us par iktifā kare.

<sup>7</sup> Ham duniyā meñ apne sāth kyā lāe? Kuchh nahīn! To ham duniyā se nikalte waqt kyā kuchh sāth le jā sakeᅅge? Kuchh bhī nahīn!

<sup>8</sup> Chunānche agar hamāre pās ᅅhurāk aur libās ho to yih hamāre lie kāfi honā chāhie.

<sup>9</sup> Jo amīr banane ke ᅅhāhān rahte haiñ wuh kāi tarah kī āzmāishoñ aur phandoñ meñ phañs jāte haiñ. Bahut-sī nāsamajh aur nuqsāndeh ᅅhāhishāt unheñ halākat aur tabāhī meñ ᅅharq ho jāne detī haiñ.

<sup>10</sup> Kyoñki paison kā lālach har ᅅhalat kām kā sarchashmā hai. Kāi logoñ ne isī lālach ke bāis īmān se bhāᅅak kar apne āp ko bahut aziyat pahuñchāi hai.

### *Shakhsī Hidāyāt*

<sup>11</sup> Lekin āp jo Allāh ke bande haiñ in chīzoñ se bhāᅅte raheñ. In kī bajāe rāstbāzī, ᅅhudātarsī, īmān, muhabbat, sābitqadmī aur narmdilī ke pīchhe lage raheñ.

<sup>12</sup> Īmān kī achchhī kushtī laᅅeñ. Abadī zindagī se ᅅhūb lipaᅅ jāeñ, kyoñki Allāh ne āp ko yihī zindagī pāne ke lie bulāyā, aur āp ne apnī taraf se bahut-se gawāhoñ ke sāmne is bāt kā iqrār bhī kiyā.

<sup>13</sup> Mere do gawāh haiñ, Allāh jo sab kuchh zindā rakhtā hai aur Masīh Īsā jis ne Puntiyus Pilātus ke sāmne apne īmān kī achchhī gawāhī dī. Inhīn ke sāmne main āp ko kahtā hūñ ki

<sup>14</sup> yih hukm yoñ pūrā kareñ ki āp par na dāᅅh lage, na ilzām. Aur is hukm par us din tak amal karte raheñ jab tak hamārā ᅅhudāwand Īsā Masīh zāhir nahīn ho jātā.

15 Kyoṅki Allāh Masīh ko muqarrarā waqt par zāhir karegā. Hān, jo mubāarak aur wāhid Hukmrān, bādshāhoṅ kā Bādshāh aur mālikoṅ kā Mālik hai wuh use muqarrarā waqt par zāhir karegā.

16 Sirf wuhī lāfānī hai, wuhī aisī raushnī meṅ rahtā hai jis ke qarīb koī nahīn ā saktā. Na kisī insān ne use kabhī dekhā, na wuh use dekh saktā hai. Us kī izzat aur qudrat abad tak rahe. Āmīn.

17 Jo maujūdā duniyā meṅ amīr haiṅ unheṅ samjhāeṅ kī wuh maḡhrūr na hoṅ, na daulat jaisī ḡhairyaqīnī chīz par ummīd rakheṅ. Is kī bajāe wuh Allāh par ummīd rakheṅ jo hameṅ faiyāzī se sab kuchh muhaiyā kartā hai tāki ham us se lutfandoz ho jāeṅ.

18 Yih pesh-e-nazar rakh kar amīr nek kām kareṅ aur bhalāī karne meṅ hī amīr hoṅ. Wuh khushī se dūsroṅ ko dene aur apnī daulat meṅ sharīk karne ke lie taiyār hoṅ.

19 Yoṅ wuh apne lie ek achchhā khazānā jamā kareṅge yānī āne wāle jahān ke lie ek ṭhos buniyād jis par khare ho kar wuh haqīqī zindagī pā sakeṅge.

20 Timuthiyus beṭe, jo kuchh āp ke hawāle kiyā gayā hai use mahfūz rakheṅ. Dunyāwī bakwās aur un mutazād khayālāt se katrāte raheṅ jinheṅ ḡhaltī se ilm kā nām diyā gayā hai.

21 Kuchh to is ilm ke māhir hone kā dāwā karke imān kī sahīh rāh se haṭ gae haiṅ.

Allāh kā fazl āp sab ke sāth rahe.

**Kitab-i Muqaddas**  
**The Holy Bible in Urdu, Urdu Geo Version, Roman**  
**Script**

copyright © 2019 Urdu Geo Version

Language: (Urdu)

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2024-09-20

---

PDF generated using Haiola and XeLaTeX on 1 Oct 2024 from source files dated 20 Sep 2024

123ff8cb-27b3-5817-a02a-22e67145fd30